

四庫全書

子部

欽定四庫全書

子部  
冊府元龜卷八十五

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣郭文鈺

欽定四庫全書

冊府元龜卷八十四

宋 王欽若等 撰

帝王部

赦宥第三

唐太宗以武德九年八月甲子即位詔曰惟天為大七  
政所以授時惟辟奉天三才於是育物故能彌綸宇宙  
經緯乾坤大庇生靈闡揚洪烈我大唐誕膺嘉運載協  
昌期丕受龍圖肇開鳳紀太上皇狗齊作聖睿哲欽明

奄有八荒光澤四表牢籠軒昊跨躡殷周金鏡俯臨玉  
燭遐被然而至德無宰成功不居高謝萬邦委茲重器  
郊禋曠禮士民翹屬欽惟宗社義存享獻朕以寡昧實  
膺統緒辭不獲免式纂洪業靈命既臻用升寶位君臨  
兆庶繼軌百王若涉大川罔知攸濟方資命哲共康治  
道今紹祚伊始奉答天休思敷惠澤被于黎獻可大赦  
天下自武德九年八月九日昧爽以前罪無輕重已發  
覺未發覺繫囚見徒悉從原免武德元年以來責情流

配者亦并放還凡厥庶僚進爵一級其五品已上先無  
爵邑封開國男六品已下各加一轉關內蒲芮虞秦陝  
鼎六州免二年租調自餘率土普給復一年八十已上  
各賜米二石綿帛五段百歲已上各賜米四石綿帛十  
段仍加版授以旌尚齒鰥寡孤獨不能自存者量事優  
恤其有至孝純著達於鄉黨徵詣闕庭厚加褒擢節義  
之夫貞順之婦州府列上旌表門閭高年碩學直言正  
諫所在長官隨狀薦舉亡命山澤挾藏軍器百日不首

復罪如初敢以赦前事告言者以其罪罪之

貞觀二年三月庚午詔曰宥過肆眚列聖所以垂風一面三驅至人所以被物故知畫冠化俗義在無刑擊磬求情志存踈網然去聖滋遠淳風漸薄上陵下替獄訟繁興罪名日積於簡書深文亟陳於嘉石自非帝堯臨政臯陶作士觀色聽聲哀矜靡失雖復三章兩造能無寃濫自新改過其道何由朕以虛薄恭膺大寶寅對三靈君臨九服昧旦求衣夜分忘寢履薄乘奔未足為喻

兢兢業業懼弗負荷是以詳詢卿宰下及芻蕘務求切  
直救其不逮推赤心於萬物罄誠言於多士惟以蒼生  
在念豈矜黃屋之尊嗟四海之未寧慮一物之失所飭  
躬厲已無忘晷刻率斯道也庶感幽明思與羣辟俱興  
至治而世教未康玄風尚鬱去歲霖雨既損秋場今茲  
旱蝗又傷宿麥萬姓嗷然懸磬已甚此皆朕之不德兆  
庶何辜將繇視聽弗明刑罰失度遂使陰陽舛謬氣序  
乖違矜物罪已載懷憂惕若使年穀豐稔天下乂寧移

灾朕身以存萬國是所願也甘心無吝此言之信有同  
皦日故披露胸臆義在無隱八方率土想見朕心今東  
作方興而膏澤不降仰彼雲漢翹心何已宜布寬大之  
恩以順雷雨之德可大赦天下

四年二月甲寅詔曰天生蒸民樹之司牧莫不仰膺靈  
命克嗣寶圖用能永享鴻名常為稱首朕君臨八方于  
今四載夙興夜寐無忘晷刻履薄馭朽思濟黔黎推心  
至誠庶幾王道上荷蒼昊之睠下藉股肱之力宇內休



平遐邇寧泰率此區域致之仁壽愷彼葷戎為患自昔  
軒昊以來嘗罹寇暴是以隆周致涇水之師強漢受白  
登之辱武夫盡力於闕塞謀士極慮于廟堂征伐和親  
無聞上策有隋灾亂憑凌轉甚疆場之萌曾無寧歲朕  
韜干鑄戟務在存養自去歲迄今降款相繼不勞衛霍  
之將無待賈晁之畧單于稽首交臂黨街名王面縛歸  
身夷邸襁負而至前後不絕被髮左衽之鄉狼望龍堆  
之境蕭條萬里無復王庭唯頡利挺身逃竄林穴天網

雲布走伏何所大同之世諒在茲日斯皆上玄降祐清  
廟威靈豈朕虛薄所能致此方欲致仁化物宜存寬惠  
思與萬邦同享斯福可大赦天下自貞觀四年二月十  
八日昧爽已前罪無輕重自大辟以下繫囚見徒皆赦  
除之逋負官物三分免一分其謀反大逆妖言惑衆及  
殺期親以上尊長奴婢部曲反主官人在法受財不在  
赦例鰥寡孤獨不能自存者州縣量加賑濟賜天下大  
酺五日敢以赦前事相告言者以其罪罪之

十月壬辰詔曰朕恭膺寶命握圖馭歷屬喪亂之後承  
凋弊之餘弘宣德化勵精治道遐邇肅清要荒來服聊  
因暇務觀省民風遵彼岐梁言臻汧渭百年之老俱稱  
鼓腹五尺之童咸欣擊壤曠言曩昔亟隳此地歲月踰  
邁以迄于茲周覽原隰悵然懷舊延問鄉黨僚吏猶存  
事異宛譙情均豐沛民和俗阜上下歡洽宜宣愷澤俾  
同慶幸可特赦岐隴二州管內自貞觀四年十月一日  
昧爽已前大辟罪以下悉從原免二州戶民無出一年

租賦八十以上鰥寡獨疾及舊任二州雜職佐史以上  
賜物各有差百歲以上就加優恤行經咸陽始平武功  
三縣見禁之囚徒罪以上各降一等杖罪以下并宜釋  
放年八十以上及鰥寡篤疾并武功縣舊軍主帥亦加  
賜物凡此界內名山大川望秩之禮備加牲幣孝子順  
孫義夫節婦隨事褒顯旌表門閭其賜物之差宜依別  
勅務從周厚以稱朕意乙卯又詔曰武功舊居與岐隴  
不異前令減罪未稱朕心其武功一縣曲赦其罪及賜

帛免租賦等特宜同岐隴二州

五年五月壬午皇太子承乾疾篤請降囚徒許之

十二月癸丑降關內諸州死罪以下

八年二月乙巳皇太子承乾加元服丙午降死罪以下

九年三月壬午詔曰天地播氣垂生育之德皇王御極

弘覆幬之仁故能財成萬類光宅八表朕祇奉慈訓嗣

守鴻業承百王之季末屬四海之凋殘夜興夕惕無忘

兆庶克已勤躬思隆政道欲使陰陽順序干戈載戢庶

幾前烈致茲刑措而東山之地頻年不稔水雨為災飢  
饑相屬蠢爾西戎屢擾邊境事不獲已遂勞兵車良繇  
誠未動天德不被物興言念此撫已多慙加以澆偽尚  
繁刑典仍用雖復留心聽斷明慎庶獄嘗恐縲紲之中  
含冤靡訴憲網所及弗辜致罪一物有怨責深在余今  
歲惟暮春時屬生長宜順天布澤與物更新可大赦天  
下自貞觀九年三月十六日昧爽以前大辟罪已下皆  
赦除之其常赦不免者不在赦例鰥寡悖獨不能自存

者所在官司量加賑恤

十一年三月幸雒陽宮癸卯降雒州管内繫囚見徒仍免一年租調

十二年二月甲戌幸長春宮以舊經鎮復朝邑縣無出今年租賦降囚免徒

十三年正月乙巳帝朝于獻陵是日赦三原縣及從官衛士等大辟已下巳發覺未發覺皆原其罪免其縣人一年租賦年八十已上及孝子順孫義夫節婦鰥寡憊

獨有篤疾者賜物各有差宿衛陵邑中郎將衛士及三原令已下各賜爵一級

十四年正月甲寅幸魏王泰宅曲赦雍州及長安獄大辟罪已下並原之延康里百姓無出今年租賦

二月丁丑幸國學觀釋奠曲赦大理萬年繫囚大辟罪已下

九月癸卯以交河道行軍總管侯君集擊高昌麴文泰破之曲赦其部內大辟罪已下其佞邪之徒勸文泰為



惡并凶逆不變抗拒官軍者不在赦例可汗浮圖城及  
從軍兵士非犯十惡并從赦免其士卒有父子犯罪以  
下罪期親犯流大功犯徒小功總麻犯杖罪悉皆赦若  
妖言惑衆殺人官人枉法受財劫賊監治之主守自盜  
所監治不在赦限

十七年四月丙戌立晉王為皇太子是日帝御承天門  
樓大陳仗衛文武百辟列於外京邑士女重疊而觀者  
皇城街悉滿當道中樹金雞大赦天下罪非十惡皆赦

之文武執事九品以上及五品已下子為父後者各加一級八十已上賜以粟帛孝子順孫義夫節婦咸表門閭鰥寡孤獨篤疾之徒量加賑給賜天下酺

十一月壬午詔曰朕嗣守宗祧夙夜寅懼憂勤在於政道撫育遍於含生十七載于茲矣上玄儲祉貞石表瑞朕式備禋燎躬謝蒼旻逮于儲兩亦申虔奉朔風既切飛雪載零及登泰壇六合開朗神祇介福豈獨在予和樂之慶宜被率土可賜酺三日自漢魏已來或賜牛酒

牛之為用耕稼所資多有宰殺深乖惻隱其男子年七十已上量給酒米麵梁州管內大辟罪已下見禁囚皇太子慮過諸州並遣使人分往唯十惡不在慮限餘皆量情降宥焉

二十年正月征遼還幸并州庚辰引從官及太原父老宴賜物有差因下詔曰太原之地興運所階全晉之人義深惟舊自朕恭膺寶歷二紀于茲何嘗不御宸長懷想峻陵之風雨臨軒遠感念大麓之雲雷當於此時乃

忘身而拯溺實賴同德並贏糧而樂推役不踰年遂清  
區域諒繇成都在衆謳訟聞虞帝之功戰牧之徒歌舞  
興周王之業仗茲協力竟至升平懷彼勤勞可忘晷刻  
既因垂拱之暇再省創業之方周歷郊原宛如疇昔訪  
其父老已多長謝不見所識魏后遂以興嗟卹彼故人  
漢皇因而式宴前王是日哀樂交懷在朕深衷義符於  
此是用具陳廣樂共申高宴取譬還譙之賞同彼幸代  
之情仍曲赦并州管內大辟已下繫囚見徒皆赦除之

常赦所不免者不在赦例

二十一年正月詔無識之徒自陷刑憲者宜順陽和特  
申思慮諸司見禁囚並宜將過詳其輕重自此已後每  
視朝錄禁囚二百人太宗親自案問降死至流流降入  
徒徒降入杖杖者並放

二十二年三月丁亥詔曰昔周武應天尅瑤臺而靡處  
漢高作極獲負陽而不居散服桃林革命先於卜筮既  
遷粉社創制肇于䟽龍朕御九成有乖斯義以茲撫事

尤須改作向者文營仁壽槩日臨雲煬起乾陽銜珠帶  
璧比阿房而競爽猶且有加擬傾宮而騁麗全於具體  
隋德云謝其徵在茲朕悼於懷為日既久故為不侈義  
顯今辰加以心懷濟育事切於肌膚亟犯風霜疾纏於  
腠理每至隆曦屆序大火摘芒雖對寒泉如升頭痛之  
坂式居珍簞若涉炎火之林繇是岳牧憂惶公卿駭懼  
累陳丹懇請建山宮歷載既深竊愛百金之費詳其至  
理宜順萬姓之心朕往冒兵凶為黔首而忘己今茲清

暑豈勞人而取安但以上奉宗祧下寧兆庶身非已有  
不可自輕敬思休攝之方兼理古先之道發明二指創  
此一宮即潤䟽隍憑巖構宇土無文績木不雕鏤鋪橋  
板以荆扉變綺窓於甕牖負宸協幽貞之賞垂纊嘉道  
世之情振此冲規方垂帝範今既成之不日賴洽普天  
宜順發生弘茲霈澤可曲赦宜君縣官及百姓并督令  
官人丁匠等大辟罪已下常赦所不免者不在赦例其  
營建當官人量加品秩及衛士以上並節級賜物先在

宮苑內住移出外者給復三年

十二月辛酉詔曰皇太子治業隆三善道兼四學惟忠孝是資寬仁在慮興言獄犴每切于懷以春陽方動請行寬宥惻隱之辭屢聞旒宸宜順其所請曲流恩降雍州長安萬年兩縣及諸司見禁囚徒三年以下差降杖罪並赦免徒罪已上徵銅未輸者亦從降例

二十三年三月丙辰甘露降時太宗雖積疾日久喜見於色謂司徒長孫無忌曰今此膏澤豈朕獨喜朕欲共



天下蒼生同茲歡慶宜卽為赦文旦日頒示也辛酉百  
官及京邑士庶并列於顯道門外見繫囚千餘人咸北  
面太宗力疾乘輿諸司庶僚百姓等車馬填噎顧謂長  
孫無忌曰百姓滋盛如此誠可哀憐朕方欲盡心布化  
令其安樂而疴瘵彌積事不遂心因慷慨長息泣數行  
下然後遣宣詔曰昔興殷解網動加惠於生靈惟堯肆  
赦播深仁於四海撫名嶽登甘泉䟽長河揖儀鳳惟皇  
祚惠此為常範朕屢越前古祗膺寶位雖復十角之寇

久變衣冠而乃三韓之野尚興車甲言念艱勤無忘鑒  
寐兼以去冬無積獻歲愆陽陳尊俎於四衢免租田於  
百郡昔成湯七載始聞兢惕朕今三月實懼於懷是以  
政令除殘商羊繼舞昭回停詠纖阿銜畢密雨高飛傾  
河驟瀉至誠無爽天意非遙宜布寰瀛同滋愷澤可大  
赦天下大辟罪已下無輕重咸赦常赦所不免者不在  
赦限其有亡官失爵宜量收叙八十已上各賜粟帛鰥  
寡惇獨及篤疾者量加賑貸

高宗以貞觀二十三年六月甲戌即皇帝位詔曰粵以  
孤藐屬當元嗣荷構乾儀若臨冰谷思勵虛薄康濟元  
元敬順惟新仰昭先德宜布愷澤被於億兆可大赦天  
下內外文武賜勲官一級諸年八十以上賚以粟帛雍  
州及諸州比年供軍勞役尤甚之處並給復一年

永徽元年八月庚午親慮囚徒死罪降充流流降入徒  
餘決杖而免之慮未盡者令太尉無忌左僕射李勣等  
同慮之

三年正月甲子詔曰去秋少雨冬來無雪今陽和在辰春作方始膏澤未降良疇廢業或恐獄訟之間尚有淫濫含冤未達弗辜致罪百姓有過責深在予宜順彼發生申茲恩宥在京及天下囚徒死罪宜降從流流已下放免鰥寡惇獨及篤疾之徒量加賑恤務令得所

七月丁巳立陳王忠為皇太子大赦天下五品已上子為父後者賜勲一轉大酺五日

四年十月庚子幸溫湯甲辰免新豐見禁囚

五年二月辛未帝在萬年宮詔曰恭膺寶命嗣奉遙圖  
居萬乘之尊當四海之責遐觀往烈詳求前古每希蹤  
於哲后常勞心於庶務兢懼弗寧憂勤若厲屬天下無  
事區宇有截仰高風於汾射暫清暑於林泉朕昔在震  
宮侍遊茲壤山川如舊歲月不追今既俗阜年和華夷  
胥悅緬懷徽範情兼感慰宜遵省方之義且順陽和之  
序曲申惠澤式彰寬宥行幸所經諸縣及岐州囚徒行  
人犯罪者流降徒徒已下並免之

六年正月壬申親謁昭陵還行宮詔曰朕躬膺大寶嗣  
隆景業虔奉成則光闡洪猷昧旦兢懷分宵動慮蒼昊  
垂祐宗社降靈順黎元之心藉忠賢之力俗登仁壽道  
暨升平遠肅邇安時康俗阜履端受節陽和肇氣親率  
庶寮奉詣陵寢遺弓永慕切終身之憂撫鏡纏悲興寒  
泉之思敬深如在哀隆罔極荐享既畢精禮獲申式表  
因心宜弘愷澤可曲赦醴泉縣并行從人大辟罪已下  
皆赦除之百姓宜免今年租調右監門員外將軍嘗基

在此宿衛進爵一等陵令陵丞各加一階并節級賜物  
二月乙巳皇太子忠加元服詔大辟已下罪并降一等  
杖者悉原之

十月乙卯詔立武氏為皇后令來月一日備禮冊拜丁

巳大赦天下流人達前所放還緣王柳蕭等家

臣欽若等曰王

皇后等并舅家柳氏及蕭淑妃家也

配流者不在此限八十已上老人各

賜粟二石綵三段百歲已上各賜粟五石綵十段孝子  
順孫義夫節婦咸表門閭鰥寡惇獨篤疾之徒不能自

存者量加賑恤

顯慶元年正月辛未立代王弘為皇太子壬申大赦天下改永徽七年為顯慶元年文武職事九品以上及五品以上子為父後者各加勲一轉亡官失爵並宜量叙諸年八十以上各賜粟帛其有孝子順孫義夫節婦咸表門閭鰥寡惻獨篤疾之徒不能自存者量加賑恤賜天下大酺三日

二年二月幸雒陽宮辛酉詔雒州管內并行從者大辟



已下並降一等死罪徒流已下悉原之雒州百姓免一  
年租調

十月幸鄭州壬子次汜水頓曲赦鄭州管內

三年二月甲戌自東都還戊寅錄京城囚徒悉原宥之  
四年十月皇太子弘加元服大赦天下文武官職五品  
以上子孫為父祖後者各加勳官一級大酺三日

五年二月丙戌帝在并州曲赦并州管內及所經州縣  
義旗初職事五品已上身亡歿墳墓在州者令所司致

祭佐命功臣子孫及大將軍府佐以下見今在者賜階級有差

八月癸未以蘇定方等討平百濟曲赦神丘道行軍大總管以下兵士及其父母妻子大辟罪已下賜天下大酺三日

龍朔元年二月乙未晦以益綿等五州皆言龍見改顯慶六年為龍朔元年曲赦雒州境內

二年七月戊子朔以皇子旭輪滿月大赦天下大辟罪

已下無輕重悉原之賜酺三日

三年十二月庚子詔以絳州麟見於介山含元殿前銀  
臺閣內並覩麟迹改來年正月為麟德元年在京雍州  
諸縣見繫囚徒各降一等杖罪以下並免之

麟德元年八月己卯降萬年縣囚徒流罪從徒從杖  
杖已下并宥之

二年四月丙午以蠻獠平曲赦桂廣黔三府管內

乾封元年正月戊辰朔有事於泰山壬申御朝觀壇受

朝賀大赦天下改麟德三年為乾封元年諸行從文武  
官及見朝覲岳牧二京留守并邊要州都督刺史三品  
以下並賜爵一等四品已上加授一階諸老年人年八十  
已上者版授刺史司馬縣令婦人版授郡縣君並節級  
量賜粟帛天下百姓年二十一已上八十以下賜爵一  
級車駕所經州給復一年齊州停日稍久給復一年半  
兗州管嶽給復二年逋租懸調欠貸官物並宜免徵孝  
子順孫義夫節婦表其門閭終身勿事率土之內賜酺

七日

總章元年三月庚寅詔曰朕以寡薄忝承丕緒奉二聖之遺訓跨億兆以初臨馭朽兢懷推溝在念而上玄垂祐宗社降休歲稔時和人殷俗阜車書混一文軌大同簡玉泥金升中告禪百蠻執贄萬國來庭朝野歡娛華夷胥悅但為郊禋嚴配未安太室布政敷化猶闕合宮朕所以日昃忘疲中宵輟寢討論墳籍錯綜羣言採三代之精微探九皇之至蹟斟酌前載製造明堂棟宇方

圓之規雖兼古實肆筵陳俎之法獨運財成宣諸內外  
博考詳求度其長短冀廣聞見而鴻生碩儒俱稱盡善  
宜命有司及時赴作務從折中稱朕意焉今陽和在辰  
景風扇物昆蟲草木有以自康朕之百姓尚多勞止思  
覃惠澤與其更新可大赦天下改乾封二年為總章元  
年大辟罪以下皆赦除之

二年九月己亥帝自九成宮還京師乙巳至岐州以高  
祖初仕隋為扶風太守故曲赦岐州管內

咸亨元年三月甲戌朔以京師旱大赦天下改總章三年為咸亨元年

四年十月乙未帝在九成宮以皇太子納妃裴氏禮畢曲赦岐州

上元元年八月壬辰追尊祖宗諡號改咸亨五年為上元元年大赦天下長流人并放還五品以上各舉所知大酺三日

二年六月立雍王賢為皇太子大赦天下

三年二月丁亥帝幸汝州之温湯令御史中丞杜文範  
慮汝州囚徒罪輕者皆免之

儀鳳元年十一月壬申以陳州上言鳳凰見於宛丘縣  
改上元三年為儀鳳元年大赦天下

三年四月丁亥朔以旱親慮市城繫囚悉原宥之戊申  
大赦天下

調露元年六月辛亥大赦天下改儀鳳四年為調露元  
年



永隆元年八月乙丑立左衛大將軍雍州牧英王哲為  
皇太子改調露二年為永隆元年大赦天下大酺三日  
二年七月以太平公主出降曲赦京城囚徒大辟罪已  
下

開耀元年九月壬戌裴行儉等獻定襄所獲俘囚乙丑  
改永隆二年為開耀元年曲赦定襄軍及諸道緣征單  
于突厥官吏兵募等

永淳元年二月癸未以皇太子誕皇孫滿月大赦天下

改開耀二年為永淳元年大酺三日

二年九月己丑以皇女太平公主誕育曲赦東郡都城

內

弘道元年十二月丁巳詔曰朕以寡昧謬膺丕緒未嘗  
不孜孜訪道戰戰臨人馭朽懷秋駕之危負重積春冰  
之懼日慎一日三十四載於今矣何則足寒傷心人勞  
傷國下安即上逸時弊即君憂所以身處九重而情周  
萬姓建本之懷遽切抑末之念逾深今雖庶績已寧淳

源未洽履素歸厚者遂寂寥而靡聞狗華趨利者尚馳  
驚而不息顧以薄德有謝移風永念羣方在予多愧况  
朕之縣系兆自玄元固當遠協先規光宣道化變率土  
於壽域濟含生於福林屬想華胥載勞寤寐所冀內外  
寮采各竭乃誠敷惟黎民俱崇簡質舊染薄俗咸與惟  
新憑大道而開元共普天而更始宜更申霈澤廣被絃  
埏可改永淳二年為弘道元年大赦前後責情流人並  
放還老人年百歲以上者版授下州刺史婦人版授郡

君九十已上者版授上州司馬婦人版授縣君八十已上者版授縣令并婦人并節級量賜粟帛孝子順孫義夫節婦表其門閭終身勿事鰥寡憫獨篤疾不能自存者量加賑恤仍天下諸州置道士觀上州三所中州二所下州一所每觀各度七人又比來天后事條深有益於政言近而意遠事小而功多務令宗用式遵無怠見任內外官五品以上經四考及守五考經三考六品以下計滿三考政有清勤狀無私犯者各加一階

中宗神龍元年正月丙午即位大赦天下唯張易之黨不在原限其周興等所枉破家人子女已進宮及配沒者賜爵一級東宮官寮見任六品加官計階應入五品者特令不拘年限諸州百姓免今年租稅天下宗姓普準舊式房州百姓三年給復於是天下大悅是月甲子立妃韋氏為皇后大赦天下內外官預陪位者賜勳一轉大酺三日

三月甲申朔文明以來被破家人特從赦免所有子孫

並還其資陰其揚州構逆黨唯徐敬業一房及裴炎不在免餘并原宥

九月壬午親祀昊天上帝土皇地祇于明堂禮畢制曰朕聞唯天為大所以上序三宗唯帝為尊于是宏開七廟故知肇興衢室爰申宗祀之規為建明堂或廣嚴禋之禮莫不八窓四達分氣候於炎涼複廟重簷定尊卑於昭穆實為國之洪訓乃經邦之茂典我國家睿祖神宗重光累葉道軼羲農之上功侔造化之初冠今昔而

居尊掩寰區而作大朕承撫天運纘聖開元披鳳歷而  
乘時握龍圖而建極春秋變易每增霜露之心日月推  
移倍切烝嘗之思然而城臨丹鳳清廟久安水控玄龜  
神基未立金輿往幸空展望於瑤祠玉輦來巡實幸親  
於碣石三川帝里八水皇州豈都邑之相誇而郊畿之  
有謝所以交風輿壤還開候雁之庭睽日明區更置馴  
龍之室巍巍紫座無虧薦鮪之途奕奕彤宮遂得獻羔  
之所加以總章霧闢重屋煙披懸晦日于梅梁掛晴虹

于桂棟是以用斯珪璧奠彼牲牢唱孤竹之簫管奏空  
桑之琴瑟爰於祔享之日乃至禋宗之辰景色殊常烟  
雲冠古或凱風南至紫喜氣而分輝或驟雨東來引祥  
雲而合嚮固可以作樂崇德殷薦上帝而璧海遥澄覺  
三邊之霧捲丹霄上廓看九野之塵清祖宗之靈貺昭  
然宇宙之神心可見虔誠既展盛禮斯弘宜覃作解之  
恩以廣奉先之德但赦者小利而大害始泰而終否著  
小人之幸非君子之幸今歲已來頻敷渥命徒長僥倖



逾犯憲章非所以弘獎風猷發揮明教深慮無知者因  
茲獲罪有識者緣此致譏遐思管仲之篇緬想吳漢之  
說恐負丕構慨然長想昔孔明相蜀王猛佐秦咸以數  
赦為言俱稱肆眚非便朕惟新闡政方事澄源期望古  
而裁規具脩今而布澤伏以禮申崇祔情展泰禋式流  
曠蕩之恩兼明懲勸之道可大赦雒州境內天下諸州  
見禁囚徒罪應至死者特宜免死配流者入徒餘并原  
宥京文武三品以上賜爵一級四品以上各加一階外

文武官九品以上賜爵一轉皇親嗣王仍特許珮金魚袋內外職事官三品以上及四品清官并中書門下五品官父已亡者並量加追贈如聞天下諸宮皆盡化胡之變諸寺亦盡老君之形一種尊容兩俱不可限制到後十日並除却若有故留者即科違勅罪其化胡經先有明勅禁斷如聞在外仍頗流行自今諸部化胡經事及餘凡說化胡事處並宜除削在外百姓婚娶之家百兩未行二親俄殯停哀之際便即成婚遂輟直經之容

敢申花登之禮寧戚之心安寄罔極之志闕如敗俗傷風莫過於此自今以後宜即懲革自弘道以前經任相三年以上及秦府晉府寮佐四品以上并食實封功臣雖經罪責不至破家子孫無任京官者特宜優與一官英府周府舊寮五品已上子孫亦宜准此天下百姓為父後者各賜古爵一級大酺三日

十一月壬午親謁太廟告謝受尊號之意禮畢大赦天下前後流人非反逆緣坐者並放還緣張易之徒黨本

犯配流者量輕重與遠官京官文武官及朝集士九品已上加一等三品以上賜爵一等外官九品已上賜勳一轉安國相王諱鎮太平公主並加實封通前萬戶天下賜酺二日

二年十月戊戌自東都還十一月乙巳大赦天下從行文武官九品已下賜勳一轉

三年四月庚寅幸薦福寺曲赦雍州其故吏周府官從至寺者各賜勳一轉

七月辛丑太子重俊與成王千里舉兵誅武三思癸卯以重俊等既就誅夷大赦天下成王千里等親黨不在原限

景龍元年九月庚子御太極殿受神龍皇帝尊號禮畢大赦天下改元景龍文武官三品已上賜勳一轉

二年二月庚寅順天皇后言衣箱中裙上有五色雲起久而方歇帝令畫工圖其狀以示百寮乃大赦天下內外五品已上官母妻各加邑號一等

十一月己卯安樂公主降武延秀禮畢大赦天下賜酺三日

三年十一月己丑親祀南郊禮畢大赦天下繫囚見徒及十惡咸赦除之雜犯流人並放還京文武官及應集考使別敕陪位官邊州都督刺史諸軍大使副三品已上賜爵一等四品已下加一階應入三品者三品減四考五品減三考聽入外文武官賜勳一轉舉堪刺闕內諸州無出今年地稅令內五品已上各舉堪使縣令者

天下大酺三日

十二月甲午幸新豐溫湯甲辰曲赦新豐縣大辟已下  
四年正月己卯以金城公主出降吐蕃帝幸始平縣送  
之二月壬午曲赦始平縣大辟罪以下百姓復給一年  
少帝溫王唐隆元年六月庚子臨淄郡王平韋庶人辛  
丑詔曰大盜移國朝有賊臣見危授命家多義士朕以  
凶閔觸諸糜潰姦豎搆扇傾陷宗社潛圖竊發機兆未  
萌相王第三子臨淄郡王隆基糾合同盟忠勇奮怒志

除兇黨保護邦家逆賊常溫馬秦客葉靜能宗楚容紀  
處訥武延秀趙履溫楊均等密行鴆毒先聖暴終朕志  
不圖全枕戈泣血風雲玄感情計陰通太平公主男衛  
尉卿薛崇暎與前同州朝邑縣尉劉幽求總監鍾紹京  
日夜共謀誓誅逆黨兇徒驚恧投竄無所今天衢交泰  
氛祲廓清宜申作解之恩以洽升平之化自唐隆元年  
六月二十一日昧爽已前大辟罪以下常赦所不免者  
咸赦除之其逆賊頭首咸已斬決自餘支黨一無所問



內外官三品以上賜爵一等四品已下加一階隆基可  
封平王食實封一千戶賜物五千段薛崇暎封立節郡  
王食實封五百戶賜物三千段鍾紹京可銀青光祿大  
夫守中書侍郎潁州郡開國公食實封二百戶賜物一  
千段前同州朝邑縣尉劉幽求可朝議大夫守中書舍  
人仍參知機務中山郡開國男食實封二百戶利仁府  
折衝麻嗣宗可雲麾將軍行左金吾衛中郎將賜物一  
千段追貶皇后韋氏為庶人安樂公主為悖逆庶人

睿宗以唐隆元年六月甲辰即位大赦天下自唐隆元  
年六月二十四日辰時已前大辟罪已下咸赦除之內  
外官三品已上各加爵一等四品已下各加一階內外  
職事官五品已上各舉所知一人諸道征鎮人家令州  
縣檢校

景雲元年七月七日平王為皇太子大赦天下制曰天  
下公器非上聖無以運其機域中大業非元良無以固  
其本朕欽若靈命寅奉神宗屈已順人用安四海承祧

主堯實貞萬國頌者家臻大憫在疚惟憂臬鏡滿朝豺  
狼塞路武職戎政必任凶徒國要時權咸升逆黨社稷  
之守望絕苞桑忠義之懷惟其艾棘階禍稔惡伺隙乘  
間煩言碎辭所不勝述皇太子正氣凝姿端命敏德自  
家刑國英徽日湛移孝為忠雄謀電發北宮馳入掃欂  
槍於紫衢南宮反正開日月於黃道平亂寧夏翼戴朕  
躬一旅不勞功逾復禹百神咸舉事邈興周聲應吹銅  
望惟當璧今遣司空讀冊命侍中授璽實由立義豈曰

尚親承華肇開元嗣以建宜申游雷之澤仍紀景雲之瑞可大赦天下改唐隆元年為景雲元年自七月二十日昧爽以前大辟罪已下咸赦除之其犯十惡常赦所不免者不在赦限內外文武官九品已上子為父後者賜勲一轉公卿各舉孝友忠正堪任東宮官一人自神龍以來直諫枉遭非命咸令封植其墓

十一月葬中宗于定陵曲赦萬年高陵三原華原富平等縣自景雲元年十一月二十一日昧爽已前大辟罪

已下咸赦除之常赦不免不在赦例

二年四月壬寅大赦天下繫囚見徒流移未達前所及已到流所者皆赦之京官四品以下加一階外官賜勳一轉三品以上各賜一爵天下濫度僧尼道士女冠等先經度者並令依舊諸州廢寺觀并依舊名置立

八月乙卯以高祖舊宅有柿樹天授中已經枯死至是重生因而大赦天下謀殺人造偽頭首者并免死配流嶺南官典取受者特免放

延和元年五月戊寅有事於北郊辛巳大赦天下改太極元年為延和元年五月十二日昧爽以前大辟罪已下咸赦除之其十惡及劉誠之胡大宰徒侶并不在赦限文武官預大禮各賜勳一轉天下大酺五日

先天元年八月甲辰傳位於皇太子帝稱太上皇大赦天下改元先天自先天元年八月七日大辟罪已下咸赦除之其常赦不免者不在赦限

二年三月太上皇詔曰恤刑緩獄古之通義務本勸農

國之常典今陽和布氣膏澤順時凡厥黎民咸事東作而疲人嬰法自滯園扉言念於此有軫于懷宜從寬宥使營稼穡其京城內見禁囚除死罪以外並特放免營農天下諸州亦宜準此

七月甲子左僕射竇懷貞等與太平公主謀逆事覺伏誅是日太上皇御承天門樓下詔曰天步時艱王業多難亂常干紀何代無之我國家累聖膺期重光繼統戎蠻慕義遐邇無虞朕以寡昧嗣守丕祚嚮明而理景景

忘劬冀寓內之小康庶羣生之遂性又使家知禮讓人  
盡忠良不謂姦宄潛謀蕭牆作釁逆賊竇懷貞蕭至忠  
岑羲薛稷李慈李猷常元楷唐峻唐昕李晋李欽賈應  
福傅孝忠僧惠範等咸以庸微謬承恩幸未申毫髮之  
效遂與梟獍之心共舉北軍突入中禁將欲廢朕及皇  
帝以行篡逆朕令皇帝率眾討除應時殄盡元惡既戮  
姦黨畢殲宗社乂安人神胥悅務申寬大之典宜覃肆  
宥之恩可大赦天下自大辟罪已下無輕重咸赦除之



其逆人魁首未捉獲及應緣坐者並不在赦限自餘黨類往還一無所問布告遐邇咸使知聞

冊府元龜卷八十四

欽定四庫全書

冊府元龜卷八十五

宋 王欽若等 撰

帝王部

赦宥第四

唐玄宗先天元年十月庚子謁太廟禮畢御延喜門下  
制大赦天下

開元元年三月丁卯御承天門樓下制曰朕承累聖之  
鴻源荷重光之積慶昔因多難時屬遘屯寶位深墜地

之危神器有綴旒之懼事殷家國義感人祇吟嘯風雲  
恭行雷電致君親於堯舜濟黎庶於休和遂以孟秋允  
升儲貳旋承內禪繼體宸居拜首之請空勤讓王之誠  
莫展恭臨億兆二載于茲上稟聖謨下凝庶績大荒同  
軌瀛海無波不謂姦慝潛謀蕭牆竊發逆賊竇懷貞等  
頃以庸妄擢居台庭毫髮之效未申丘山之釁仍積共  
成梟獍將肆姦回太上皇聖斷宏通英謀獨運命朕率  
岐王範薛王業等躬事誅鋤齊斧一麾凶渠盡殪太陽

朗曜澄氛靄於天衢高風順時厲肅殺於秋序人靈叶  
贊夷夏相歡四族之慝既清七百之祥方永爰承後命  
載闡休期總軍國之大猷施雲雨之鴻澤承乾之道既  
光被於無垠作解之恩思式覃於品物當與億兆同此  
維新可大赦天下大辟罪已下咸赦除之邠王守禮加  
實封二千戶宋王成器申王成義各加實封一千戶岐  
王範薛王業各加七百戶文武官三品以上賜爵一級  
四品以下各加一階內外官人被諸道按察使及御史

所通惡狀咸宜洗滌選日依資叙用十二月庚寅大赦  
天下改元為開元

二年六月甲子制曰朕聞養人者謂之司牧非逸於人  
上事天者謂之帝王蓋御於天下故作為棟宇以避燥  
濕居於臺榭以順高明斯乃奉時令布朝政也朕以不  
德祇膺睿圖寶十家之產愛兆人之力未嘗興工於土  
木役思於池籞與之休艾以致邕熙自律應長羸時方  
大暑溽雲屢起溫風且至伏以太上皇宴居保衛滌慮

清閒迹不往于甘泉心每期於汾水朕侍於左右以奉  
晨夕助玄默之化則虧於聽理當炎蒸之序又瀆以器  
煩惕焉載懷敢忘順色然大明創兆先聖所營即舊不  
如因時而往千門萬戶外雖衛於別宮一日三朝中自  
連於複道下所以寧問安之懇上所以資習靜之娛實  
獲我心俾康政理古有服珍裘者則念人之寒居夏屋  
者則念人之熱况此歲阻飢甫田不稔或愚人陷罪圜  
土稱寃凡厥庶僚將何以恤兩京及諸州宜令長官親

理寃獄除犯名教及官典犯賊并緣妖偽以外餘罪徒以下咸宜赦免其有茂才異等拔萃超羣緣無紹介久不聞達者咸令自舉朕當親問其應宣撫使名聞舉人試第四等須準舊例別加優獎見任人各量與改轉前資常選人至冬依選例處分其未出身者兼授散官先天以來軍將押衛官等在陣戰亡者令本軍勘實奏聞其說災祥誑惑閭里并令州縣長官等嚴加捉搦仍令御史訪察繩糾有能直言極諫補朕之闕者各封狀進



朕將親覽如有可採當加獎擢其皇親諸親及東宮丞  
優任員外檢校試等官近停令至冬處分者有家道貧  
迫情愿外任者亦令所司勘實量才注擬其緣坐流人  
處置有輕重不類者令所司勘實奏聞

三年正月丁酉冊郢王嗣謙為皇太子因下詔降見禁  
囚徒死罪者免死徒流已下罪悉原宥之

二月辛酉制曰青春式序陽和布氣萬物熙熙莫不遂  
其性而嘉其生也申念愚人干我王度日陷坑竅冥之

網羅朕代天理物為人父母眷言囚繫良增隱惻宣憲章之尚密將教道之不明歟順時行令抑惟常典兩京及天下見禁囚除犯惡逆造偽以外決一百配流嶺南磧石諸州其餘一切放免

五月丁未命宰臣親行京城諸獄省察囚徒下詔曰惟刑恤哉古之道也朕撫臨四海茂育兆人思致淳風登之壽域期盡冠而不犯故開羅而在宥念茲下愚自抵常法時屬盛夏天其養生在物最靈惟人為貴朕處臺

榭猶有鬱蒸之毒彼居囹圄能無憺懼之憂故令宰臣  
備加案察省覽所奏用憫于懷爰矜可恕之罪必務惟  
輕之義將布寬惠俾從原減應合書罪者宜遞降一等  
論

十月癸亥詔巡遊所過之縣見禁囚徒以下減放免流  
以上罪具犯狀奏聽進止戊辰大理具囚名奏帝覽之  
以所犯重者降一等輕者並釋放下詔曰朕祇膺鴻圖  
嗣守丕業何曾不馭朽增惕納隍在慮六合之內每勤

祗綏五刑之屬尤用欽慎然簡書多室惕之訟圜扉有  
幽滯之人淹恤逾時羈縲相對頗異哀矜之義實慙恢  
疎之網雖刑政之典彼則自貽而在予之責終以多愧  
其大理禁囚前令詳覆者宜按所犯輕者並放重降一  
等仍依令式處分十二月有司所奏往幸鳳泉所過之  
縣流以上囚奏聽進止者凡稱原減頗詳故事罪至死  
刑寬其大戮况聽成有法閱實無寃屬陽和上春積雪  
未降天地之於庶物正亭之而毒之皇王之撫兆人寧

以殺而止殺申念重辟惻然疚懷特布湛恩助茲生氣  
其犯斯刑者宜決一百配流遠惡處其犯杖配流者宜  
免杖依前配流已決及流三千里者節級稍移近處二  
千五百里以下並宜配徒以殿

臣欽若等曰殿  
謂自遠而近也

五年二月甲戌行幸至東都大赦天下唯謀反大逆不  
在赦限餘並宥之河南府百姓給復一年河南北遭澇  
及蝗蟲處無出今年租武德貞觀以來勲臣子孫無在  
位者詳求其後奏聞有嘉遯逃棲養高不仕者州牧各

以名聞

八年九月丙寅制曰五刑之用以禁奸慝三宥之設以矜愚耄朕永康四海憂在兆人俾臻大化爰措庶獄而愚妄之色抵犯或聞向隅可哀當宁與軫今天地既肅申嚴在命時分其令罪則無留載懷幽犴思布生德宜崇減死之恩式明宥過之典其京城內犯罪人等時令按覆其中造偽頭首及謀殺人斷死者決一百配流嶺南惡處斷死者決一頓免死配流遠處雜犯流移者各

減一等杖罪已下並免

九年五月庚午詔曰自昔明王恤人為念朕君臨寓縣  
子育黎蒸一物乖宜常切納隍之慮萬方有罪再軫泣  
辜之責故勸農務穡國政攸先捨過錄功帝圖惟永况  
麥風炎序梅律歆辰言念狴牢情深惻隱宜申緩獄之  
令以布宥刑之澤其天下見禁囚徒犯流已下徒已上  
特宜免以嘗科並遣隨軍展效仍令所司明為年限條  
例隨便近諸軍分配冀能竭力勉樹勲庸其杖已下即

令釋放使務農業

十一月庚午大赦天下內外官九品以上加一階五品

已上加爵一等自六月二十日七月三日

臣欽若等曰  
玄宗景隆元

年六月三日平常庶人先天  
二年七月三日平太平公主

匡衛社稷食實封功臣坐

事削除勳封官爵中間有先死者並量加收贈致仕官  
合佩魚者聽其終身大酺三日

十一年正月丁卯敕曰獻歲肇春陽和感氣且是發生  
之日實惟布德之辰朕將幸秦京言離雒邑既省方以



觀俗思弘恩以濟人載念狴牢又惻襟抱宜敷寬大之  
典用敦祝泣之意都城內見禁囚徒除犯十惡及造偽  
頭首餘雜犯流死等各減一等徒以下並放是月己巳  
鑾輿發東都北巡狩下制曰朕爰自瀍雒有事省方乘  
發生之和因豫動之慶將欲恤鰥寡問老疾陳詩展禮  
黜幽陟明使滯伏必申微物咸遂其行幸所至處宜令  
刺史縣令存問百年老病鰥寡憚獨及行人家如有單  
貧不濟不能存活者量加賑給其侍老仍各賜物三段

見禁囚徒除十惡及身犯反逆并造偽頭首以外自餘  
雜犯流死等罪各減一等徒以下放免百姓有賢良官  
人有清白並令中書門下採訪名聞其貪濁之吏委御  
史覺察彈奏庚辰幸潞州曲赦大辟已下給復五年是  
月癸巳帝車駕在并州勅曰朕躬承寶位十有餘年荷  
累聖之昌圖膺三靈之眷命日慎一日雖休勿休今省  
俗觀風肆覲羣后陳詩納賈親問百年雖念勞人事資  
展禮太原舊國王業所興乃眷成周西巡豐鎬因惟嗣

漢東至沛鄉皆會彼舊都眷茲粉社况興王始封之地  
鴻圖創業之初含育生靈大造區宇永惟丕構顧慙貽  
厥且稱用武戎役是殷宜錫懷舊之恩以順發生之澤  
太原府境內見禁囚徒除十惡及造偽頭首餘並赦免  
預宴官共賜物二千疋父老及吏人等共賜物一萬疋  
百姓宜給復一年九等戶給復三年元從家給復五年  
其家籍見在終身免征役侍老年八十已上賜物五段  
版授上縣令仍賜緋婦人版授上縣君九十已上賜物

七段版授上州長吏仍賜緋婦人版授郡君百歲已上  
賜物十段版授上州刺史仍賜紫婦人版授郡夫人孝  
子順孫義夫節婦旌表門閭終身勿事其有沉淪草澤  
抱德栖遲及武德功臣子孫并元從子孫才堪文武並  
委府縣搜揚具以名薦

十一月戊寅親祀南郊大赦天下制曰朕獲主三靈于  
今一紀聽政中昃每不敢康觀書乙夜將求諸道而頃  
年以來為理思至或遠人不率或嗣歲不登淳朴未還

惕厲斯在為人上而懃德奉天明以畏威祝史正詞必  
期於陳信郊丘備禮將俟於升平今宗廟降靈克開厥  
後乾坤交泰保合太和麟鳳龜龍玄符黃瑞之祉蠻夷  
戎狄梯山航海之琛孰不日月以聞道路相屬顧惟不  
德當茲休運欽若昭報疇咨故實所以今年獻春恭祠  
后土季秋吉日追崇九廟採必先於魯經稽肆類於虞  
典爰因長至欽謁上玄告受命之元符昭嚴配之成績  
大典云備至誠克展諸侯駿奔來於穆之相百神受職

率咸秩之文六變已陳三獻斯畢蓋春秋大事莫先乎  
祀王者盛禮莫重於郊而柴燎克終感慶罔極豈予一  
人之福亦爾萬邦之賴宜用咸和之祭俾承厚下之澤  
可大赦天下自開元十一年十一月十六日昧爽以前  
罪無輕重已發覺未發覺已結正未結正繫囚見徒大  
辟罪已下咸赦除之其十惡死罪造偽頭首劫賊殺財  
主不在赦例就中仍慮有寃濫者所司具狀送中書門  
下盡理詳覆奏聞朕將親覽升壇行事官及供奉官三

品已上賜爵一級四品已下加一階内外文武官及致仕并前資陪位者賜勳一轉親王公主各與一子官凡諸軍節度大使及三都留守不備位委寄既重特宜同陞壇官例百歲老人賜帛五段粟五石縣令至其家存問給付孝子順孫義夫節婦旌表門閭終身勿事諸州百姓或有因逢水旱流寓未安者宜令所司與朝集使即作賑恤安輯法奏聞征行人家州縣檢校勿令侵欺鰥寡惇獨州縣矜恤使得存濟元置義倉救人不足承

前貸百姓糧及種子未納者並免不須却徵自古聖帝  
明王忠臣烈士名山大川并令所管致祭其左貶官非  
逆人五服內親及犯贓賄名教者所司勘實奏聞量移  
近處其人有清白政術堪任刺史縣令及抱器懷才不  
求聞達者長官具以名薦宗室中有孝悌才行為衆所  
知仍在卑任者委宗正具以名奏君臣一體休戚共焉  
朕承天命傳大寶蓋憑憑累祖餘業得一之符亦繇羣公  
舊勳不二之力永言繫賴其敢忘之自武德以來實封



功臣知政宰輔有身無大故而亡官失封子孫淪屈者  
所司勘實具以狀聞存者可酬其官榮逝者當錄其裔  
嗣使幽冥同慶知有今辰亞獻邠王守禮終獻寧王憲  
各賜物一千疋侍中源乾曜中書令張說兵部尚書同  
中書門下三品王峻各賜物五百疋二王後賜物一百  
疋二品三品八十疋四品五品六十疋六品七品四十  
疋八品九品三十疋郡主縣主各賜物八十疋天下賜  
酺三日京城五日

十三年正月戊子制曰惟刑是恤止殺之深仁寧失不  
經好生之大德朕恭膺丕業思濟元元下之陷辜上教  
不至在予之責何咎于人今履端肇序陽和獻歲思布  
德澤惠此囹圄將弘愷悌之恩以順發生之氣其天下  
見禁囚徒死罪宜降至流流已下罪悉原之都城內委  
中書門下當日疏決處分京城委留守制到日處分仍  
令中丞蔣欽緒往河南大理少卿明珪往關內刑部郎  
中張樽往河東水部郎中崔恂往山南東道右庶子高

仲舒往江南西道職方郎中鄭績往劍南道秘書丞張  
履冰往淮南道殿中侍御史孫濟往隴右道贊善大夫  
張景幽往河西道右諭德李林甫往山南道主客郎中  
張烈往江南東道並即馳驛發遣所至之處疏決囚徒  
宣慰百姓其有窮乏交不存濟及侍老行人之家有疾  
苦者各令州縣量加醫療及賑恤其嶺南五府磧西四  
鎮非流配効力等見禁囚徒各委節度使及本管都督  
府處分布告遐邇知朕意焉

十一月壬辰以封禪禮畢御朝覲壇之帳殿朝羣臣大赦天下制曰朕聞天監為后后克奉天既合德以受命亦推功而復始厥初作者七十二君道洽跡著時至符出皆用事於介丘升中於上帝人神之望蓋有以塞之皇王之序可得而言之朕接統千歲承光五葉惟祖宗之德在人惟天地之靈作主往有內難幽贊而積大勲間無外虞守成而續舊服未嘗不乾乾終日思與公卿大夫上下叶心聿求至理以弘我列聖其庶乎馨香今

九有大寧羣萌樂業時必敬愛而不奪物亦順成而無  
天懋建皇極幸至太和洎乃幽遐率繇感被戎狄不至  
唯文告而來庭麟鳳已臻將覺悟而在藪以故凡百執  
事亟言大封顧惟不德初欲勿議伏以先聖儲祉與天  
同功荷傳慶以在今敢侑神而無報大節斯在朕何讓  
焉遂奉遵高宗之舊憲章乾封之典時邁東出柴告岱  
嶽精意上達肝嚮來應信宿行事雲物呈祥登降之禮  
斯畢嚴配之誠獲展百神羣望莫不懷柔四方諸侯莫

不來慶斯天下之介福也邦家之耿光也無窮之休祉  
豈獨在子非常之惠澤宜其逮下可大赦天下自開元  
十三年十一月十日昧爽已前大辟罪已下罪無輕重  
已發覺未發覺已結正未結正見禁囚徒咸赦除之唯  
十惡死罪不在此例流人未達前所者放還内外文武  
官三品以上賜爵一等四品已下賜一階邠王守禮寧  
王範薛王業各與一子三品官公主嗣王郡主縣主各  
與一子官其應行從文武官加階之外並賜勳兩轉孔

子從褒聖侯優與處分天下致仕官各依本品賜一季  
祿及束帛諸蕃侯王首來會禮者各加一官其行幸州  
縣供頓劬勞百姓並免一年租賦兗州免二年租賦朕  
永惟王業繫賴舊勳元首股肱其猶一體自武德以來  
功臣宰輔或名存王府遺嗣沉淪或身無大故銜屈泉  
壤宜令所司訪擇申理唐元立功官人往屬艱難能盡  
忠義今成大禮何日忘之宜各與一子出身朕躬步天  
門宿齋日觀時屬嚴冬雪後初夜風寒朕因露立祈恩

誓欲代人當咎俯仰之際頓息霜飈奠獻之晨變同韶  
景誠荷上天垂祐亦賴靈山吐祥詩云無德不報宜封  
泰山神為天齊王禮秩加三公一等宜令所管崇飭祠  
廟去山十里禁其樵採給近山二十戶以奉神祀天下  
賜酺七日

十五年七月己亥降都城繫死囚及流罪各減一等徒  
已下罪悉免之

八月己巳制曰朕作人父母為天下君豈將巖廊為逸



嘗以億兆為念何嘗不養之如子視之如傷驅彼民俗  
躋之仁壽使勝殘之道自我王政好生之德洽于人心  
皆遷善以遠罪亦有耻而且格靡然向風以致刑措今  
秋典戒令理官議獄愍此愚者猶聞抵冒當宁發想興  
言疚懷宜布惠和之澤用伸矜降之典俾率土之內知  
朕意焉天下見禁囚犯死罪者特宜免死配流者配邊  
州効力徒已下罪並赦免官人犯贓罪不在此例其未  
有斷給者各處本犯定刑名準此處分

十六年三月辛丑制曰頃屬初陽肇授移輦新宮因施  
惠布德用順時令徒已下罪並責保放營農今詳其刑  
格亦非重罰已釋囹圄不可更收宜許自新特從免放  
九月丙午以久雨思宥罪緩刑乃下詔曰古之善為邦  
者重人之命執法之中所以和氣洽嘉禾茂今秋京城  
連雨隔月恐耗其稟粒而害于粢盛抑朕之不明何政  
之闕也永惟久雨者陰氣凌陽冤塞不暢之所致也持  
獄之吏不有資性生於刻薄輕重出於愛憎邪詩曰此

宜無罪汝反收之刺壞法也書曰與其殺不辜寧失不經明慎刑也好生之德可不務乎兩京及諸州繫囚應推徒已下罪并宜釋放降死罪及流各一等庶得解吾人之愠結迎上天之福佑布告遐邇知朕意焉

十七年四月癸亥制天下繫囚死罪減等餘並宥之十一月丙申謁橋陵以奉先縣為赤縣曲赦縣內大辟罪已下戊申謁諸陵還大赦天下制曰祀之大者莫尊於嚴享德之至者莫加於孝敬故周廟頌思文之章漢

陵躬展事之禮因心斯在敢不肅祇我國家應天受期  
駿惠丕命繼武宗文之德重熙累洽之盛故以道高系  
表首冠帝先朕以眇身獲保鴻業往屬多難時逢國屯  
推戴神宗纂復興運允迪前烈載康兆民此蓋仗卿士  
之謀叶神祇之贊豈伊薄德敢承天休露往霜來久積  
園陵之思秋嘗夏禘聿思孝饗之誠乃夏朔辰祥芝產  
於太室及秋吉日珍木瑞於神宮對越上靈拜茲嘉貺  
頃以秋稼未實民役尚勞每事害農豈惟在予有咎之

責因親設教恐違先旨恤隱之方今三時已和百禮斯  
洽宗樂宿設萬舞在庭敬爾臣工駿奔執豆蠲潔為饗  
明德惟馨有來雍雍載懷怵惕之思至止肅肅如聞歎  
息之聲降格有終纏感罔極瞻弓劍而莫及捧鏡奩而  
哽咽始自嶠嶽終奉梁山紫氣升於壽宮甘露遍於陵  
樹白兔馴擾瑞草呈祥恭惟昭陵載感王業肆台小子  
夙奉睿圖及齋戒虔誠率祇祀典聖容昭見靈迹尤彰  
每四方多虞中國有事雖升龍已遠而躍馬如神及配

奠壽宮親聞忤躍幽明合慶今古未聞蓋皇天眷於我  
唐神心昌於後嗣延祚之祉豈獨在予一人錫類之恩  
宜廣覃於四海可大赦天下自開元十七年十一月二  
十二日昧爽已前大辟罪已下罪無輕重已發覺未發  
覺已結正未結正繫囚見徒常赦所不免者咸赦除之  
自先天以來有雜犯經移近處流人並配隸磧西瓜州  
者朕捨其舊惡咸與惟新並宜放還其反逆緣坐長流  
及城奴量移近處編附為百姓左降官量移近處官人

有亡官失爵齒力未衰者量加收錄天下百姓無出今年地稅之半如已徵納聽折來年逋租懸調在百姓腹內者一切放免孝子順孫義夫節婦旌表門閭終身勿事諸州侍老百歲以上賜帛十段九十已上賜五段八十已上賜三段獻陵昭陵定陵官吏并管陵縣官各別加一階陵戶並放從良終身灑掃陵寢仍每陵側近取百姓六鄉以供陵寢永勿徭役自古帝王賢臣將相陵墓宜令所在州縣致祭内外文武官三品已上加爵一

等四品已下各賜一階亞獻皇太子鴻賜物二千疋終  
獻慶王潭賜物一千疋邠王守禮寧王憲薛王業各賜  
物八百疋忠王浚隸王洽鄂王滉光王浚等各賜物七  
百疋中書門下賜物五百疋開府王毛仲賜物三百疋  
皇親五等已上諸親三等已上及文武百僚各賜物有  
差自古明王因心以待人曲已以施物故休戚共而憂  
樂同也中書門下丞相尚書開府三省大將軍父並賜  
三品官九卿三監十二衛監門羽林軍五省長官三府



尹大都督長史父各贈四品官五品已上清官父各賜  
五品官凡所贈官宜兼贈母邑號俾夫羣臣受榮上延  
父母先帝遺澤下及幽冥興言及此良多感歎君臣一  
體榮辱是同龍蛇之歌古今作戒其唐隆元年兩營立  
功官三品以上與一子官其四品已下選日優與進改  
京兆府供頓縣免今年地稅諸道戰亡人家仰州縣存  
恤不支濟者量事賑濟諸軍健兒別勅行人各賜勳兩

轉

十八年正月丁巳親迎氣於東郊祀青帝下制曰皇王  
之大化備載於所陳必順時而行政將奉天而育物考  
古之要莫不繇斯自膺寶位欽若上玄萬物叶心庶物  
簡易齊七政以察璿璣勸兆庶而勤稼穡日慎一日于  
今二十年矣何嘗不夙夜祇畏憂勞在懷思致黎元以  
弘政理屬獻歲初吉乘時布令是用敦本復古將必稽  
於月令始謀作則先有事於春郊宜因展禮之辰別布  
惟新之澤其天下見禁囚徒自開元十八年正月五日

昧爽已前大辟罪已下罪無輕重已發覺未發覺已結  
正未結正繫囚見徒常赦所不免者咸赦除之其左降  
官及流移配隸安置罰鎮効力之類并宜量移近處其  
官已復資至叙用之時不須為累其流人配隸并一房  
家口者所犯人情非劫害身已亡歿其家口放還流人  
及左降官考滿載滿丁憂服滿者亦準例稍與量移其  
亡官失爵放還不齒及諸色被停解免與替人等非犯  
賊者宜令司存勘責量加收叙其衰老疾病者仍與致

仕官天下百姓今年地稅并諸勾徵欠負等色在百姓  
腹內未納者并一切矜免亞獻太子鴻賜物二千疋終  
獻寧王憲賜物一千疋文武百官及有司職掌等各賜  
束帛有差率土之內賜酺三日其海內五嶽四瀆及諸  
鎮名山大川及靈跡并自古帝王得道升仙忠臣義士  
先有祠廟者各令郡縣逐處設祭

十九年四月壬午詔曰法以閑邪刑以助化因時而用  
蓋非獲已朕自臨御天下憂勞庶務以至誠感物道既

有孚以致理和人仁或繇已豈欲以刑制政期於以化  
清刑故不用殊絕之誅每施寬大之令而遷善者衆犯  
法者寡斷獄十數聞諸有司然猶一夫不獲在予實懷  
多愧寰宇殷廣京都浩穰繫于微纆或未聽理逮捕斯  
擾糧饋為勞生業或虧何以卒歲言念於此深用憫然  
况今長羸在辰耘耨斯切順時立政存于恤人思弘在  
寬之典庶無留獄之弊其天下囚徒即令疏決其妖訛  
盜賊造偽頭首既深蠹時政須量加懲罰刑名致死者

各量決重杖一百長流嶺南自餘支黨被其誣誤矜其  
至愚量事科罰使示其懲創流已下罪並節級處分令  
中書門下就大理及府縣詳理

八月辛巳帝降誕之日有黃雲三道於西方制天下死  
罪配流已下罪原免之

二十年二月壬午制曰行慶施惠所以奉天時緩刑恤  
獄所以愛人命今陽和布序草木自榮而或入于罪隸  
嬰于春橐同被亭育之恩未暢生成之施言念于此深

用憫然思弘時令以哀黎庶應天下囚徒罪至死者特寬宥配隸嶺南遠惡處其犯十惡及造偽頭首量決一百長流遠惡處流罪罰鎮三年其徒已下罪並宜釋放其有官吏犯賊推未了者仍推取實收定名訖然後準降例處分計賊一疋已上及與百姓怨讎者并不須令却上其上都委中書門下䟽理京城委留守天下諸州長官當日處理其責保停務之類並宜準此

十月辛卯北巡狩至潞州飛龍宮曲赦潞州給復三

年兵募丁防悉放辛丑至北都曲赦太原給復三年

十一月庚午祀后土於睢上是日大赦天下制曰昔者巡狩所至柴瘞所在蓋取誠享以尊告類朕承祖宗之烈獲主神祇之祀夙夜祇畏不敢荒寧故勒兵朔垂先展義於汾社廻旆睢上遂有事于郊壇王者父事天母事地則漢氏祈穀未始正名周禮降神乃為徹福而已朕以天命之重子道為先惟茲精誠在乎教孝庶蒙福



於四海期永康於兆人是以率繇舊章敬恭明祀嚴配  
之誠既展奠獻之禮又終且春秋之義大事在祀齋祭  
之福庶品惟祺豈獨在予而有斯慶可大赦天下自開  
元二十年十一月二十一日昧爽已前大辟罪已下罪  
無輕重已發覺未發覺已結正未結正繫囚見徒常赦  
不免者咸赦除之官人犯贓及有罪被推者本罪雖原  
不得更令却上先天以來雜犯流移人并配隸人等各  
量移及先經量移官資未復本品者奏聽進止天下遭

損免州及供頓州無出今年地稅如已徵納聽折來年  
逋租懸調貸糧種子欠負官物在百姓腹內者並宜放  
免諸州開元十七年已前所有貸糧種子欠負官物在  
百姓腹內者亦宜準此孝子順孫義夫節婦旌表門閭  
終身勿事諸州侍老百歲已上賜粟五石八十已上賜  
粟三石亞獻皇太子鴻賜物二千疋終獻慶王潭賜物  
一千疋忠王浚已下各賜物三百疋裴光庭蕭嵩弼亮  
朕躬弘益思遠不有優異何殊等夷加階賜爵之外各

與一子官仍賜物二百疋二王後及長公主嗣王郡主  
縣主各賜物二百疋行從文武官并節級賜物升壇三  
品已上特賜一階應入三品官階相當不限考數緣大  
禮有執掌官賜勳三轉内外文武官三品已上賜爵一  
等四品已下各加一階致仕官賜物有差行從蕃客共  
賜物五千疋管壇一鄉百姓給復二年武德初功臣每  
有大慶必存追遠業參運始而義合賞延其子孫沉翳  
無在朝者宜令勘責即與官唐元立功官等艱難之際

誠效亦深言念其功豈忘終始其三品已上各賜一子  
官五品已上各賜紫金魚袋有亡歿者優贈與官仍與  
一子官兩京留守京兆河南尹四大都督府長史諸軍  
節度副大使準行從官例處分諸道陣亡人家仰州縣  
存恤不支濟者量事賑給皇親中有文武才堪任使者  
委宗正具以名薦當有獎擢五嶽四瀆名山大川及自  
古聖帝名王忠臣輔相各令致祭務盡誠潔率土之內  
賜酺三日

二十一年五月戊子以皇太子納妃下制曰禮有謹於  
初義亦重其本凡是姻媾且猶正於人倫況在元良更  
將承于宗祀皇太子鴻儲副是屬仁孝自然爰從吉辰  
式備嘉禮上祀下繼君子重之言告言歸朕豈無慰罪  
獨在子之慶宜申與衆之澤囚徒死罪特宜免罪配流  
嶺南遠處流罪降至徒徒已下罪並宜釋放諸道征行  
人家及鰥寡惇獨委州縣長官檢校矜放差科使安其  
業長安萬年兩縣百姓及今月當番人等並免其家今

年地稼京文武九品已上各賜勲一轉東宮九品已上及諸司緣禮會祇供官等更加一轉五禮使兵部尚書兼中書令蕭嵩特封徐國公禮會使黃門侍郎同中書門下平章事韓休特與三品妃禮會使少府監馮紹正賜紫金魚袋皇太子舅尚輦奉御趙迥遵特與三品及五品官前右威衛胄騎趙迥進特與五品及五品官皇太子侍讀侍書等各加一等階其太子諭德潘肅特與五品太子妃兄通事舍人薛愿特與五品及五品官今

日應預會官等各節級賜物即宜領取安慰者所以宣  
其情頒錫者所以將其意公卿百辟庶知朕心

二十二年五月詔曰時尚炎蒸人或寃繫豈忘仁恕固  
須省察其兩京都城見禁內宜令中書門下及留守檢  
校覆訖徒已下罪及委所繇長官據情狀量決罰便放  
死罪已下遞降一等有情狀難容合決格杖者決訖準  
例處分天下諸司委刺史並準此

二十三年正月乙亥親耕籍田大赦天下制曰昔者受

命為君體元立極未有不謹於禮而能見教於人朕且庶乎有慙作者方冊存而可舉舊章絕而復尋自古所行無一而廢將以上乞靈於宗社下蒙福於黎元朕茲精誠天寶降鑒今嗣歲初吉農事將起禮先陳於耕籍義緣奉於粢盛所以嚴祗敢不敬事故躬載耒耜親率公卿以先萬姓遂終千畝謂篤本之為爾何布澤之更深宜有順於發生俾無偏於行惠可大赦天下自開元二十三年正月十八日昧爽已前大辟罪以下罪無輕



重已發覺未發覺已結正未結正繫囚見徒咸赦除之  
其犯十惡死罪不在此限自餘死罪并節級降等處分  
天下諸州貸糧種子并宜赦免京兆河南府通縣欠負  
亦宜赦免天下戶役及貢賦先令中書門下均融減省  
宜速與條奏諸軍行人有父母年老七十已上者放還  
本貫行人有身亡者為造棺槨遮還本鄉兩京城內今  
年所有諸雜夫役并宜赦免農桑是時不得妨奪州縣  
官倍加勸課孝子順孫義夫節婦並旌表門閭鰥寡悃

獨不能自存量加優恤天下侍老百歲已上版授上州  
刺史九十中州刺史八十以上州司馬七十已上所繇  
仍量給酒肉各令存問亞獻皇太子鴻賜物二千疋終  
獻慶王潭賜物一千疋邠王守禮等各賜物一千疋忠  
王浚已下各賜物三百疋汝陽郡王淳以下各賜物三  
百疋裴耀卿張九齡李林甫自期翊贊誠有忠益頒賞  
以序等數須優各與一子官賜物三百疋二王後賜物  
一百疋長公主各與一子官仍各賜物二百疋嗣王郡

主縣主各賜物一百五十疋京文武官九品已上官三  
郡留守諸道採訪使及節度使賜物有差管籍田縣令  
更賜物六十疋京文武官及朝集使諸道節度使採訪  
使新除五品已上官未赴任畿縣令見在陪位者三品  
已上賜爵一級四品已上加一階皇親并内外文武官  
九品已上各賜勳一轉蕃客應陪位者共賜物五千疋  
近壇百姓各免今年雜差科宗廟致享務在豐潔禮經  
沿革必本人情籩豆之薦或未能備物服制之紀或有

所未通宜令禮官學士詳議具奏朕自臨天下二紀于茲不敢荒寧日加兢業而灾眚未弭黎人未康若有繇而然則在予之責有能直言極諫者具以狀聞每竭賢良無忘監寐頃雖虛佇未副旁求其或才有王霸之畧學究天人之際智勇堪將帥之選政能當牧宰之舉者五品以上清官及軍將都督刺史各舉一人孝悌力田鄉閭推挹者本州刺史長官各以名聞致仕官久歷清資始終著稱年漸衰邁情有可矜量與改職依前致仕

宗室中有才行著聞比尚沉屈者委宗正卿責勸奏聞  
唐元兩營立功官量與進改亡官失爵量加收叙五獄  
四瀆名山大川及自古聖帝明王忠臣良相並令所在  
長官以禮致祭都城之內賜酺三日

二十四年四月丁丑勅曰朕每思政本先教後刑而難  
遷之徒抵罪猶衆幽繫囹圄綿歷歲時今漸向鬱蒸豈  
忘惻隱仍慮持法者不謹得罪者有冤若無省察何云  
哀矜天下見禁囚犯十惡死罪及造偽頭首刼殺人先

決六十長流嶺南遠惡處自外死罪先決一頓並流嶺南流罪情狀重者決六十輕者決一頓決訖並放徒已下並放其有隱沒詐情官物及盜仍責保立限徵賦準節文處分其官人犯贓合解免仍勿令重上都城內宜令中書門下京城委留守外州委本州長官即䟽決處分

十月發東都還京甲子至陝州勅曰朕永懷西土陵寢在焉至自東都誠慰罔極兼茲巡省且無怨思篋子之

望多謝哲王飲至之規豈忘前典其供頓州應緣夫役  
差科並免今年地稅行從飛騎萬騎三衛引駕監門各  
賜物五段兵曠掌閑及諸色當蕃人各賜物三段緣路  
供頓刺史縣令及專知官各賜一中上考從行有職掌  
武官賜勲一轉京兆及岐同華三州畿輔之間百役所  
出至於征鎮又倍餘州其今年租并依本州納其脚縱  
已走入京亦令所司計折酌還兩京城內及京兆府諸  
縣囚徒反逆緣坐及十惡故殺人造偽頭首死罪特宜

免罪長流嶺南遠惡處其餘雜犯死罪隸配効力五年  
流罪並放罪人犯賊量罪貶降緣近頓所損麥苗宜令  
州縣即簡括量酬價直畿內侍老九十已上量賜酒麪  
鰥寡惻獨及征行之家宜令州縣長官親自存問如有  
疾患量加醫藥使近甸之內咸有賴焉

二十六年正月丁丑親迎氣于東郊祀青帝下制曰皇  
王之化載籍所陳將奉天而育物必順時而行政雖禮  
文則著而親祠蓋闕朕自膺寶歷且踰二紀承宗社之



降祉賴公卿之叶心萬物阜成庶務簡易思以黎獻臻  
夫仁壽是用敦本復古將必稽於月令謀始作則先有  
事於春郊宜因展禮之辰式布惟新之澤其天下見禁  
囚應犯罪者特宜免死配流嶺南已下罪並放免朕每  
念黎甿斃於征戍親戚多別離之怨關山有往復之勤  
何嘗不惻隱於懷寤寐增嘆所以別遣召募以實邊軍  
錫其厚賞便令常往今諸軍所召人數向足在於中夏  
自可罷兵既無金革之事足保農桑之業自今已後諸

軍兵健並宜停遣其見鎮兵並一切放還京畿之內雜  
役殷繁言念劬勞豈忘優恤頃以櫟陽等縣地多鹹鹵  
人力不及便至荒廢近者開決皆生稻苗亦既成功豈  
專其利京兆府界內應雜開稻田并散給貧丁及逃還  
百姓以為永業書不云乎不作無益害有益語不云乎  
奢則不遜儉則固緬懷前古嘗折在心將斲雕以為樸  
期上行而下效自今已後王公不得以珍物進獻所司  
應緣宮室脩造務從節儉但蔽風雨勿為華飾至於金

玉器物諸色雕鏤朕緣蕃客所要將充宴賞今流俗之間遞相放效既損才於無用仍作巧於相矜敗俗傷農莫斯為甚并一切禁斷以絕浮華古者鄉有序黨有塾將以弘長儒教誘進學徒化人成俗率繇於是斯道久廢朕用憫焉宜令天下州縣每一鄉之內別各置學仍擇師資令其教授其諸州鄉貢明經進士每年引見訖更令國子監謁先師所司設食學官等為之開講質問疑義且公侯之裔皆稟義方學禮聞詩不應失墜容其

僥倖是瀆化源其於貴胄子孫多有不專經業便與及第深謂不然自今已後宜依令式考試朕之爵位惟待賢能雖選士命官則有常調而安卑退跡尚慮遺才其內外八品以下官及草澤間有學業精博蔚為儒首文詞雅麗通於政術為衆所推者各委本州本司長官精加搜擇具以聞薦發生之月實在于行仁利物之心莫先於作善先斷捕獵令式有文所繇州縣宜嚴加禁止其每年千秋節日仍不得輒有屠宰釋道二門皆為聖

教義歸弘濟理在尊崇其天下寺觀有道士女冠僧尼者宜量寺觀大小各度六七人簡灼然有經業戒行為鄉閭所推仍先取年高者凡百卿士朕之同德宜勉所職以全時令亞獻忠王璵宜賜物一千疋終獻穎王璪賜物五百疋邠王守禮寧王憲各五百疋慶王琮已下及長公主郡縣主二王後京文武官賜帛各有差天下諸州侍老宜令所繇長官量賜酒肉務存優養今朝廷無事天下和平美景良辰百官等任追勝為樂宜即布

告中外咸使聞知

四月己亥朔始令太常卿韋韜讀時令于宣政殿百寮於殿上列坐而聽之勅曰朕仰稽古訓思致人和爰發繇衷之旨以行順時之政今孟夏初吉三農在朝禮先決於薄刑義必寬於輕繫既聽其令用軫於懷囹圄之間少間於冒法澄清之使咸盡於忠公猶慮更有煩苛人或寃滯是爽和平之氣殊乖敬授之心其天下見繫囚徒及事發應推身不禁者放即遣使分往諸道量事

疏決及宣布時令除犯贓賄名教十惡死罪自餘徒已下特宜赦免廻日奏聞務在欽恤以稱朕懷


七月己巳冊皇太子是日大赦天下制曰自昔聖人恭有神器必立儲兩宗其繼明所以尊宗廟重社稷也朕獲纘休運丕承寶歷五聖之業敢不克勤萬邦之本期諸永固是以式遵彝訓乃擇元良太子瑛植性溫恭因心孝友文武之道既著君親之義以弘有命之初咸聞慶躍興言士庶能協朕心是用擇以吉辰申之冊命思

惠率土以暢休期可大赦天下自開元二十六年七月  
二日昧爽已前大辟罪無輕重已發覺未發覺已結正  
未結正繫囚見徒常赦所不免者咸赦除之比年已來  
十道採訪使通官人惡狀以其微瑕為終身之累豈得  
永無甄叙許以自新宜令御史臺及刑部大理寺參詳  
所犯輕重類例開奏内外文武職事官九品已上各賜  
勳一轉五品以上子為父後者亦賜勳一轉其忠王府  
官及侍讀侍書除賜之外三品已上賜爵一級四品以



下各加一階仍並即與改轉緣冊命行禮官各賜物有  
差今月番見上飛騎萬騎監直長三衛引駕細伏執扇  
黃衣長上等各賜勳一轉曠騎番兵各放免一番天下  
侍老八十已上各賜粟三石帛三段百歲已下賜粟五  
石綿帛五段并加版授至如磧西之人路途遙遠往復  
勞弊頗異諸軍其中願長往者已別有處分訖年鎮向  
藩應合放還未到之間稍省優假其家內諸色雜科并  
宜放免如有營農不自辦者州縣量事助借各使存濟

京畿近輔百姓所出雖庶務簡省終異於諸州其百姓等應單貧下戶者特放今年半租率土之內賜酺三日



冊府元龜卷八十五